

熊勿軒先生文集
附錄



熊勿軒先生文集

附錄

熊 鈺 撰

王雲五主編

叢書集成初編

熊勿軒先生文集

附錄

中華民國二十五年十二月初版

朱

撰者

熊

銖

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

許序

文之傳世。豈易云乎。不深於道德。不能以爲文。不關乎世教。不足以言文。道德其本。關世教其用歟。求其真才實學。全體大用。具天地之綱常。壽斯民之命脈。紹聖賢之統緒者。吾於建陽熊先生足徵焉。先生諱禾。字去非。號勿軒。又號退齋。自幼有志道學。師事文公高弟輔氏。講貫聖經賢傳之旨。沈潛天人道德之蘊。登宋度宗咸淳進士。授邵武司戶參軍。時四方釋騷。道梗不赴。及宋社旣屋。遂隱於雲谷。扞鼇峯書院。聚徒講道。四方來受學者雲集。四書六經。皆有訓釋。著農禮兵刑稟。晚年修三禮通解。將脫稟。竟以疾卒。平生著述甚富。厄於兵火。獨四書標題。易經講義。詩選正宗。小學句解。傳於世。鼇峯嗣孫熊澍。家藏遺稟。存十一於千百。族孫孟秉。類次成帙。釐爲八卷。傳諸家塾。二世孫斌。判惠之博羅。慨念先世手澤。重加考訂。繡梓以傳。求予序之。可謂孝子慈孫之用心乎。捧誦再三。不能釋手。夫有命世之大賢。斯有及門之高弟。先生生文公考亭闕里。雖未及門受業。其真才實學。著書立言。實有功於文公也。惜乎遭宋叔世。不能以竟其蘊。乃時之不幸。非先生之不幸也。然其遺書尙存。嘉惠後學。於以立綱常。關世教。紹統緒。實斯文之幸。天下後世之幸。豈顯晦用舍。足爲先生輕重哉。矧逢聖明。崇儒重道。列之先賢。祀之學宮。亦可謂無負先生之功矣。斯集之傳。若星辰麗空。江河行地。遠而彌光。久而彌芳。不可以時文例論。顧予何人。而敢僭序先生之文耶。然以判簿公之請。不容辭。故序其大略如此。判簿公讀書善吟。清慎詳雅。民咸悅之。蓋

原序

士之以聖賢自命者。其明體達用之學。不爲浮華詭遇。一以世道爲心。不得大行。則用之以羽翼經傳。其學爲有本。而後其言爲足傳。武彝勿軒熊先生。生當宋季。受業於朱子之門人輔氏。年弱冠讀大學。玩索有得。喟然歎曰。學在是矣。因益窮研四書。以及諸經。務爲有體有用之學。每病世之儒者。議論多而踐履少。詞章盛而事功衰。以故特立不肯遷就。觀其謝鄉舉。貢舉兩書。於感恩知己中。惟以讀書濟時相質證。其氣節有過人者。先生見道不可行。乃卷而懷之。與諸弟子結廬武彝。旁搜遠紹。接墜緒之茫茫。衍紫陽之正派。作詩云。斯文一縷千鈞日。我輩三經五典身。其擔當斯道爲何如哉。所著若干集。蚤經行世。其文俱在。無非本義葩麟戴之旨。爲明體達用之言。有裨後學。良非淺鮮。至於別配享而正孔廟之儀。黜邵馬而定五賢之祀。百世不能易焉。昔人謂朱子爲聖門功臣。若先生者。不又爲朱子之功臣與。聖朝崇尚正學。隆禮先賢。先生之言。固宜琬琰珍之。球圖重之者也。余旣景仰先生之爲人。而又樂其所學之有本。因爲重梓其集。播之海內。使有志聖賢之學者。慨然而興。是則先生之澤也夫。

康熙四十八年己丑季春。儀封後學張伯行。書於榕城之正誼堂。

熊勿軒先生文集目錄

卷之一

序

孝經大義序

史纂通要序

農桑輯要序

翰墨全書序

題童竹澗詩集序

送胡庭芳序

送胡庭芳後序

送詹君履學正序

送夏思學歸江東序

贈地理吳竹澗序

贈熊雲岫挾星術遠游序

卷之二

序 跋

麻沙劉氏族譜序

江氏族譜序

四時治要方序

蔡氏春秋後序

跋交信錄序

跋文公再游九日山詩卷

熊竹谷文集跋

跋謝春堂詩義後

跋林氏兄弟遺事後

跋姚氏族譜

敬齋銘箴跋

卷之三

記

考亭書院記

三山郡泮五賢祠記

晉江縣學記

閒樂堂記

虛直軒記

北苑茶焙記

曝背龕記

卷之四

論議疏

帝堯萬世之功論

虞君思輔少康復國論

熊勿軒先生文集

目錄

孔甲篆龍論

商有三仁兩義士論

湯執中立賢無方論

商鞅徙木立信論

漢主不拜嗇夫論

祀典議

重修武夷書院疏

刊儀禮經傳通解疏

重建建陽書坊同文書院疏

洛陽新建同文書院疏

重建文公神道門疏

代母梅庵題考亭書院祀田疏

重建御史坊富義橋疏

重建會文橋疏

重建麻沙書錦橋疏

重建莒口橋疏

卷之五

文 啓劄 說 銘

答戒酒文

建同文書院上梁文

鼇峯祭先聖文

又

又

又

又

謝鄉舉論學

謝貢舉啓

聘啓

又

熊勿軒先生文集

目錄

回定啓

又

又

熊回虞

易卦說

適堂說

虞彥忱字說

張以謙字說

約我齋銘

卷之六

附錄

勿軒先生傳

題勿軒先生行狀

送勿軒先生歸武夷序

送退齋東歸序

與退齋論學

鼇峯書院記

送退齋歸武夷 六首

登雲谷呈熊退齋

贈退齋同年貢舉

鼇峯書院舍菜禮成

熊勿軒先生文集卷之一

宋 熊 禾 撰

序

孝經大義序

孔門之學。惟曾氏得其宗。曾氏之書有二。曰大學。曰孝經。經傳章句。大略亦相似。學以大學爲本。行以孝經爲先。自天子至於庶人。一也。堯典一篇。大學孝經之祖也。自克明峻德。以至親睦九族。極之百姓之昭明。萬邦之於變。大學之序也。孝之爲道。蓋已具於親睦九族之中矣。何也。一本故也。自是舜以克孝而徵五典。禹以致孝而敍彛倫。伊尹述成湯之德。一則曰立愛惟親。二則曰奉先思孝。當時人紀之修。孰大乎是。文武周公率是而行。上而宗廟之享。下而子孫之保。宗支庶蕃。道化流衍。且二千餘年。推其效。必至於四海之內。人皆親其親。長其長。一鱗毛一牙甲之微。無不得所。而後爲孝之極致。嗚呼。二帝三王之教。可謂大矣。孝經一書。卽其遺法也。世入春秋。皇綱紐解。孔子傷之。三復昔者明王孝治之言。思之深。望之切矣。誠使天子公卿躬行於上。凡禮樂刑政之具。一是以孝爲本。則斯道也。固天性之自然。人心之固有。一轉移間。王道顧不易易乎。惜也。徒託之空言。而僅見於門人記錄之書也。書存而道可舉。雖不能行之一時。猶可詔之來世。今此經之可考者。不過漢藝文志而已。而其篇次。則顏註古文二十二章。孔壁所藏本也。今文一十八章。漢河間所得顏芝本。而劉向之所參校者也。要之出於漢儒傳會。皆非曾氏門人所記。

舊文矣。唐玄宗開元敕議。意非不美。而司馬貞淺學陋識。并以閨門一章去之。卒啓玄宗無禮無度之禍。而其所製序文。至以禮爲外飾之所資。仁義爲後來之漸。有不知所謂因心之孝者。果何所因。而又何自而萌乎。學之不講。德之不修。一至於此。桓桓朱子。特起南夏。平生精力。用工於易四書爲多。至此書則僅成刊誤一編。註釋大義。猶有所未及。噫。人子不可斯須忘孝。則此爲天子至庶人。一日不可無之書。章句已明。而大義猶闕。顧非一大欠事乎。蓋嘗有志彙集諸家傳註。以明一經而未果。一日。余友人新安胡庭芳。挈其高弟鄱陽董真卿。訪余雲谷。一作武夷山中。手攜父書。有孝經大義者。取而閱之。則其家君深山先生董君季亨父所輯也。其書爲初學設。故其詞皆明白易曉。熟玩之。則其間義趣精深。又有非淺見謾聞所能窺者。輒爲刊之。鼈峯書塾。以廣其傳。此豈惟學者修身齊家之要。而有國有天下者。亦豈能外是。而他有化民成俗之道哉。噫。文公一用之於滕。而四方草偃。驩動。拓跋帝再用之於魏。至使鄰國君臣。聳動愧悔。而不自已。生於其心。發於其政。今考二君行事。皆班班有三代之風。而況不止爲滕魏者乎。嗟夫。此經之廢。蓋千五百餘年矣。悠悠蓋壤。人極未墜。豈無以二帝三王之心爲心者。仁。人心也。學所以求仁。而孝則行仁之本也。語曰。如有王者。必世而後仁。愚何幸身親見之。

朱晦翁八歲通孝經大義曰。若不如此。便不成人。序中具見私淑之意。葛紀瞻

昔人有言。孝經一書。足以立心治國。何用多爲。信如先生所言。郭字山

孔子備三才之道。曰。我行在孝經。漢孝宣時。二疏以之訓儲。孝章時。介冑皆通孝經。孝靈時。向栩言北

向讀孝經。賊自消滅甚矣。孝經之不可不講也。熊之章

史纂通要序

堯迄今年六十二甲辰矣。自是以上。年代不可考。意混茫初開。洪水未有洩。距洪荒之世。未甚久也。邵康節以元會運世。推皇帝王伯所自始。開物至堯甲辰。歲數甚闊。大抵三皇之世邈矣。其不可徵矣。五伯權利。又君子所不道。有天下者。不過行帝道而帝。行王道而王二者而已。外此皆他道也。蓋嘗纂帝王大紀一編。託始帝堯元載。下逮威烈王二十二年。以爲古今一部通史。適吾友胡庭芳挾史纂通要來閩。甚有契焉。益相與討論。閒亦蒙取節。不廢其言。蓋以人心道心爲千萬世治亂興亡之決。此河南程子所謂三代而上。純是天理。三代而下。純是人欲之意。而武夷朱子與永康陳氏所以反覆論辨而不寘者也。可謂確論矣。余又爲之躊躇卻顧。而有感於濂溪周子之言。通書不云乎。純心要矣。用賢急焉。噫。人主一心。攻之者衆。或以聲色。或以貨利。投吾之欲。千條萬端。大抵親賢臣。遠小人。則陽明勝。而天理用事。此其所以治而興也。親小人。遠賢臣。則陰濁肆。而人欲用事。此其所以亂而亡也。堯舜禹湯文武之爲君。必有皋益伊萊姬呂之爲臣。皆以輔弼之職。居師保之位。其從容啓沃。贊導彌縫。所以納君當道。而格其非心。其功端不細矣。後世人主正心之學不講。大臣格心之道不明。其患蓋本於無相業。無師道。上之人。往往好臣其所教。而尊德樂道之意未有。其在下者。又道失正傳。學昧原本。至於事君。亦苟焉富貴利達而已矣。茫茫宇宙。至以天下之大。而無可相。以天子之尊。而無可師。千五百年。泯泯棼棼。亂多治寡。厥有由矣。嗟夫。

天生斯民。果何日而蒙至治之澤乎。輒贊數語。以廣庭芳未盡之意。庭芳復謂余曰。爲政在人。取人以身。修身以道。修道以仁。人主一心無取舍之極。則焉知其賢而用之。然則天理人欲消長之機。正君子小人進退之候。周子固不曰。心純則賢才輔。賢才輔則天下治乎。此愚之所以決然以人心道心爲千萬世治亂興亡之機者。非虛言也。輒次其語。使覽是編者。知所本。而庭芳之言。爲不可易云。

如讀孔安國尚書序。典質樸茂。足弁四代之首。葛紀瞻

當時如濂洛羣哲。無一人登相臣之位者。宋之所以不得與於斯文也。郭字山

陳明卿先生謂史記爲古今大織手。齊魯千萬言。澹雅若亡言。漢書爲古今大槩局。錦江濯紅。豔麗光瑩。皆莫能及。此特言刺含敘事典重森嚴之文矣。夫文所以載道也。道之不明。文雖巧笑益哉。以人心道心。決古今興亡。誠千秋金鑑。熊之璋

農桑輯要序

古農桑輯要一編。迺大司農司頒行之書也。前建安郡丞張侯某。刻而傳之。將以廣朝廷務農重本之意於天下。誠使家實一本。奉行惟謹。則人人衣食以足。而風俗可厚。教化可興矣。抑孟子之言。田必百畝。桑必五畝。雞豚狗彘之畜。必不失時。然後黎民可以不飢不寒。老者可以衣帛食肉。蓋三代所以極其品節制度之詳。以盡其輔相裁成之道。有天下者。萬世所當取法也。嗟夫。二千年疆理之政。一壞於戰國之慢經界。再壞於秦人之開阡陌。董仲舒限田之策。既不行於國。實民富之時。苟悅均田之論。又不用於土曠

人稀之後。舉天下農桑大利。上不在國。下不在民。而悉歸於兼并豪強之家。奴婢厭綺紈。犬馬飫粱肉。而耕夫織婦。終歲絲絲而計。粒粒而數。有不得以遂其一日之溫飽者矣。不反其本。而汲汲焉末節之是詳。不能制民之產。則雖朝講夕究。徒爲空言。月要歲成。亦無益於實政也。橫渠張夫子必欲驗之一鄉。以行之天下者。夫豈無所俟哉。每愛元魏後周。口分世業之法。至桑麻田產。亦各有給。一時斯民。生意津津。可以三代。使自隋迄唐。守而不失。勿開買賣之門。勿變兩稅之法。雖至今存可也。夫豈寥闊而難行哉。老癯遺氓。欽覲詔書。蠲農租十分之二。永爲定式。不覺舉手欣賀曰。此王政之始也。何也。南北風氣雖殊。大抵農戶之食。主租已居其力之半。主戶奉公上之餘。誠能復損其二以益之。則所得佃租。視采地之祿。亦略相當矣。誠能舉而行之。以漸復古者五畝百畝之制。使貧者得以受野人之田。而食其餘。富者得以享君子之祿。而不失其養。賦稅可均。徭役可省。地不改辟。民不改聚。經制一定。豈惟三代可復。雖爲上古耕鑿擊壤之民。可也。何幸身親見之。

春蠶不煖寒肌。冬收不周夏飽。良繇古法不復。經制久湮矣。不尙空言。而圖實政。真不減樓壽玉之圖。

幽風也。

葛紀瞻

考古者。謂漢儒在宋人之上。如董如賈。醇乎醇者也。劉向匡衡。大醇而小疵。如此言言實政。直駕董賈之上。何論晉魏乎。考古者辨之。熊之璋

翰墨全書序